

Ministeria: Børne- og Socialministeria Suliap
normua: Børne- og Socialmin., j.nr. 2015-6797

**Najoqqutassamut kingusinnerusukkut
allannguutit**
Soqanngilaq

Kalaallit Nunaanni Danmarkimilu ulloq unnuarlu paaqqinnittarfinnik neqerooruteqartarneq pillugu nalunaarut

Isumaginninnikkut sullissineq pillugu inatsimmi § 196, imm. 2 naapertorlugu, tak. inatsisitigut nalunaarut nr. 369 18. aprili 2017-imeersoq, aamma isumaginninnermut tunngasuni inatsisitigut illersugaaneq allaffissornerlu pillugu inatsimmi § 90, imm. 2, tak. inatsisitigut nalunaarut nr. 1345 23. novembari 2016-imeersoq, inatsit nr. 1543 13. decembari 2016-imeersoq aqqutigalugu allanngortinneqartoq, Kalaallit Nunaatalu Naalakkersuisuisa isumaqatiginninniarfigereerneranni, aalajangersarneqarpoq:

Kapitali 1

Atuuffia nassuiaatillu

§ 1. Nalunaarut manna makkununga tunngatillugu atorneqassaaq:

- 1) innuttaasumut, Kalaallit Nunaanni najugaqartumut, Danmarkimi ulloq unnuarlu najugaqarfinnut neqerooruteqarnissamut Kalaallit Nunaanni kommunalbestyrelse aalajangiitillugu,
- 2) meeraq 18-it inorlugit ukiulik, Kalaallit Nunaanni najugaqartoq, Danmarkimi inissinnissaanut neqerooruteqarnissamut Kalaallit Nunaanni kommunalbestyrelse aalajangiitillugu,
- 3) innuttaasumut, Danmarkimi najugaqartumut, Kalaallit Nunaanni ulloq unnuarlu najugaqarfinnut neqerooruteqarnissamut Danmarkimi kommunalbestyrelse aalajangiitillugu, imaluunniit
- 4) meeraq 18-it inorlugit ukiulik, Danmarkimi najugaqartoq, Kalaallit Nunaanni inissinnissaanut neqerooruteqarnissamut Danmarkimi kommunalbestyrelse aalajangiitillugu.

Imm. 2. Manna nalunaarut atuukkunnaassaaq, meeqqamut 18-it inorlugit ukiulimmut angajoqqaatut oqartussaassuseqartoq imm. 1, nr. 2-mut imaluunniit 4-mut atatillugu aalajangiiffigineqartoq, nunami neqerooruteqarfiusumi najugaqarpat.

Imm. 3. Aamma § 18 atuutissaaq ilaqutariit ataatsimik amerlanerusunilluunniit 18-it inorlugit ukiulinnik meerartallit angajoqqaanngortussalluunniit Danmarkimi najugaqarsimasut Kalaallit Nunaanni najugaqaleraangata.

§ 2. Nalunaarummi matumani kommune aalajangiiffiusoq ima paasineqassaaq, tassa kommune § 3 imm. 1 imaluunniit § 4 imm. 1 naapertorlugu innuttaasumut Danmarkimi imaluunniit Kalaallit Nunaanni najugaqarfinnut neqerooruteqarnissamut aalajangiisimasoq, imaluunniit § 3, imm. 2, imaluunniit § 4, imm. 2 naapertorlugu meeraq 18-it inorlugit ukiulik Danmarkimi imaluunniit Kalaallit Nunaanni inissinnissaanut neqeroorummik aalajangiisimasoq.

Imm. 2. Nalunaarummi matumani kommune tigusisoq ima paasineqassaaq, tassa aalajangiinermi

kommune § 5 naapertorlugu, neqeroorummi Danmarkimi imaluunniit Kalaallit Nunaanni innuttaasumik tigusinissamut isumaqatigiissuteqarsimasoq.

Kapitali 2

Ulloq unnuarlu najugaqarfinni najugaqartitsilerneq inissiinerluunniit

Aalajangiineq

§ 3. Innuttaasooq Kalaallit Nunaanni najugaqartoq pillugu Kalaallit Nunaanni kommunalbestyrelse Danmarkimi najukkamik imaattumik neqeroorfiginiarlugu aalajangiisinnaavoq:

- 1) Isumaginninnermi sullissineq pillugu inatsimmi §§ 107 aamma 108 malillugit najugaqariaatsit.
- 2) Isumaginninnermi sullissineq pillugu inatsimmi § 192 malillugu utoqqaat illuat il.il.
- 3) Inissiat nalinginnaasut allallu pillugit inatsit naapertorlugu utoqqarnut inissiat nalinginnaasut.
- 4) Taakkununga taarsiullugit inissiat aamma najugaqariaatsit il.il., periarfissaalersut nr. 1 aamma 2 naapertorlugit neqeroorutitut sanilliunneqarsinnaasut.

Imm. 2. Kalaallit Nunaanni kommunalbestyrelse meeqqamik 18-it inorlugit ukiulimmik, Kalaallit Nunaanni najugaqartumik, Danmarkimi inissiiffissamut isumaginninnermi sullissineq pillugu inatsimmi § 66 naapertorlugu inissiinissamut aalajangiisinnaavoq.

Imm. 3. Kalaallit Nunaanni kommunalbestyrelse aatsaat neqeroorutigineqartumi pineqartumi, kalaallit inatsisaanni inissiinermut inatsit, imaluunniit Kalaallit Nunaanni inatsit alla neqeroorummut assingusoq naammassineqarsimappata, imm. 1 aamma imm. 2 naapertorlugit aalajangiisinnaavoq. Aammattaaq Kalaallit Nunaanni kommunalbestyrelse aatsaat neqeroorutigineqartumi pineqartumi, danskit inatsisaanni inissiinermut imaluunniit najugaqartitsinermut piumasaaqatit naammassineqarsimappata, imm. 1 aamma imm. 2 naapertorlugit aalajangiisinnaavoq.

Imm. 4. Kalaallit Nunaanni kommunalbestyrelse imm. 1 imaluunniit imm. 2 naapertorlugu aalajangiinermut atatillugu, innuttaasup neqeroorummi tapiissutit suut tunniunneqassanersut aalajangiisinnaavoq. Kalaallit Nunaata inatsisaat malillugit aalajangiisoqassaaq. Taamaakkaluartoq danskit inatsisaat malillugit tapiissutit neqeroorutigineqanngitsut pillugit aalajangiisoqarsinnaanngilaq.

Imm. 5. suliassanik suliarinnittarnermi maalaaruteqartarnermilu malittarisassat qaqugukkulluunniit Kalaallit Nunaanni inatsisat atuuttut imm. 1, 2 aamma 4 naapertorlugit aalajangiinerni atuupput.

§ 4. Innuttaasooq Danmarkimi najugaqartoq pillugu, Danmarkimi kommunalbestyrelse Kalaallit Nunaanni najukkamik imaattumik neqeroorfiginiarlugu aalajangiisinnaavoq:

- 1) Inunnut annertuumik innarluutilinnut ikiorsiisarneq pillugu Inatsisartut peqqussutaat naapertorlugu najugaqatigiiffiit, najugaqarfiit illersukkat kiisalu ulloq unnuarlu paaqqinnittarfiit.
- 2) Utoqqaat angerlarsimaffii pillugit Inatsisartut peqqussutaat naapertorlugu utoqqaat angerlarsimaffii.

Imm. 2. Danmarkimi kommunalbestyrelse imaluunniit meeqqanut inuusuttunullu ataatsimiitsitaliaq, meeqqamik 18-it inorlugit ukiulimmik, Danmarkimi najugaqartumik, Kalaallit Nunaanni ilaqutariit paarsisartunut imaluunniit ulloq unnuarlu paaqqinnittarfimmut inissiinissamut, Meeqqanut ikiorsiisarneq pillugu Inatsisartut inatsisaat naapertorlugu aalajangiisinnaapput.

Imm. 3. Aatsaat neqeroorummi pineqartumi, Isumaginninnikkut sullissineq pillugu inatsimmi, inissiinissamut najugaqartitsinissamulluunniit piumasagaatit, imaluunniit danskit inatsisaat neqeroorummut allamut assingusoq naammassineqarsimappata, imm. 1 aamma imm. 2 naapertorlugu aalajangiisoqarsinnaavoq. Aammattaq aatsaat neqeroorutitut Kalaallit Nunaata inatsisaanni, inissiinissamut najugaqartitsinissamulluunniit piumasagaatit naammassineqarsimappata, imm. 1 aamma imm. 2 naapertorlugu aalajangiisoqarsinnaavoq.

Imm. 4. Danmarkimi kommunalbestyrelse imm. 1 imaluunniit imm. 2 naapertorlugu aalajangiinnermut atatillugu, innuttaasup neqeroorummi tapiissutit suut tunniunneqassanersut aalajangiisinnaavoq. Danskit inatsisaat malillugu aalajangiisoqassaaq. Taamaakkaluartoq kalaallit inatsisaat malillugit tapiissutit neqeroorutigineqanngitsut pillugit aalajangiisoqarsinnaanngilaq.

Imm. 5. Isumaginninnermut tunngasuni inatsisitigut illersugaaneq aqutsinerlu pillugit inatsimmi suliat suliarineqartarnerannut maalaaruteqarnissamullu maleruagassat imm. 1, 2 aamma 4 naapertorlugit aalajangiinerni atuupput.

Isumaqatigiissut

§ 5. Kommunip aalajangiisup, §§ 3 imaluunniit 4 naapertorlugu aalajangiisimasup, kommune tiguisoq nunap aappaaniittoq neqeroorummi innuttaasumik tigusaqarnissanut isumaqatigiissuteqarfigissavaa. Isumaqatigiittoqartinnagu neqeroorummi najugaqartitsineq aallartissinnaanngilaq.

Imm. 2. Isumaqatigiissut imm. 1 naapertorlugu paasissutissanik makkuninnga imaqaassaaq:

- 1) Innuttaasup sumi najugaqassaneranik neqeroorut.
- 2) Najugaqarnissap sivisussusaa.
- 3) Kommunip aalajangiisup kommunillu tiguisup akornanni suleqatigiinnerannut piumasagaatit.
- 4) Iliuusissatut pilersaarut, tak. § 6, matumani siunissami iliuusissatut pilersaarutip allangortinnissaanut piumasagaatit periusissallu.
- 5) Kommunip tiguisup inummut sammititamik nakkutilliinera, tak. § 7.
- 6) Nassuiaatit, tak. § 9.
- 7) Akiliineq, tak. § 14, piffissaq naatsorsuiffiusoq pillugu isumaqatigiissut ilanngullugu.

Imm. 3. Aatsaat kommunip tiguisup aalajangiisullu akornanni § 6 naapertorlugu, iliuusissatut

pilersaarut pillugu isumaqatigiinneq pisimappat, imm. 1 naapertorlugu isumaqatigiissusiortoqarsinnaavoq. Taamaakkaluartoq iliuusissatut pilersaarut pillugu isumaqatigiittoqanngikkaluarpuunniit, pissutsit immikkut ittut pissutigalugit, najugaqartitsinissaq pillugu isumaqatigiissutaagallartumik peqarnissaq pisariaqarpoq.

Imm. 4. Kommune tiguisoq kommunimut, nunap immikkoortuanut imaluunniit namminersortutut ingerlatsisumut, inuttaasup najugaqarnissaa pillugu neqeroorummik aalajangersimasumik isumaqatigiissuteqassaaq.

Iliuusissatut pilersaarut

§ 6. Innuttaasup neqeroorfigineqarnissaanut suliniutissamut iliuusissatut pilersaarummik pilersitsisoqassaaq.

Imm. 2. Neqeroorummi innuttaasup tapiissutisiassai iliuusissatut pilersaarummi allassimassapput.

Imm. 3. Kommune aalajangiisoq kommunimut tiguisussamut iliuusissatut pilersaarummut missingiummik nassuississaaq. Kommunip tiguisup kommune aalajangiisoq suleqatigalugu iliuusissatut pilersaarut naammassissavaa. Inaarutaasumik iliuusissatut pilersaarut kommunemi aalajangiisumi kommunalbestyrelsimit akuerineqassaaq.

Kapitali 3

Neqeroorummi najugaqarnermi

Nakkutilliineq

§ 7. Kommune tiguisoq, innuttaasup neqeroorummi piffissami najugaqartinneqarnerata aallartinnerani, inummut sammititamik nakkutilliisuussaaq.

Imm. 2. Nunami kommunip tiguisup sumiiffigisaani, inummut sammititamik nakkutilliineq pillugu, maleruagassat naapertorlugit imm. 1 malillugu nakkutilliisoqassaaq.

Nalunaaruteqartarneq

§ 8. Kommunip tiguisup kommune aalajangiisoq nalunaarfigissavaa, § 7 naapertorlugu nakkutilliinermut atatillugu, imaluunniit allatigut paasineqarpat suliniut aallartitaq siunertamisut ingerlanngitsaq, imaluunniit suliniutip innuttaasup pisariaqartitaanut naapertuutinnginneranik isumaqartoqarpat.

Nassuiaat

§ 9. Kommune tiguisoq ukiumut ataasiarluni kommunimut aalajangiisumut innuttaasooq pillugu

nassuiaammik tunniussaqtassaaq, taamaakkaluartoq tak. imm. 2.

Imm. 2. Kommune tiguisoq meeqqanut 18-it inorlugit ukiulinnut atatillugu ukiumut marloriarluni nassuiaammik tunniussaqtassaaq.

Imm. 3. Imm. 1 imaluunniit 2 naapertorlugu innuttaasup atugai pillugit paasissutissanik, matumani tassani allannguutinik, suliniummik ikiorsiissutinillu innuttaasup pisartagaanik, kiisalu kommunip tiguisup inummut sammititamik nakkutilliineranik nassuiaat imaqtassaaq.

Imm. 4. Tiguisutut aalajangiisutullu oqtassaaq isumaqatigiisummi § 5 naapertorlugu, imm. 1 aamma 2-mi allassimasumit nassuiaat akulikinnerusumik tunniunneqtassaaq aalajangiisinaavoq.

Pissaanermik atuineq il.il.

§ 10. Nammineq aalajangiinissamut pisinnaatitaanermi, innuttaasumut pissaanermik atuineq imaluunniit akulerunneq taamaallaat nunami kommunip tiguisup sumiiffigisaani, inatsisini aalajangersakkat naapertorlugit pisinnaavoq.

Imm. 2. Kommunalbestyrelse pissaanermik atuisinnaanissamut inatsimmiippat, pissaanermik atuinissamik aalajangiinissamut piginnaatitsimappat, kommunalbestyrelse kommunimi tiguisumiittoq aalajangiisarnissamut piginnaatitaasuvoq, taamaakkaluartoq tak. imm. 3. Taamatut aalajangiisoqartillugu, kommunip tiguisup sapinngisamik piaarnerpaamik kommune aalajangiisoq tamanna pillugu ilisimatissavaa.

Imm. 3. Kommunip aalajangiisup aamma kommunip tiguisup, isumaqatigiisummi § 5 naapertorlugu imm. 2 tamakkiisumik ilaannakortumilluunniit avaqqussinnaavaat.

Suliniummi allannguutit

§ 11. Kommunip aalajangiisup kommune tiguisoq isumaqatigiisuteqarfigereerneratigut, innuttaasumut suliniummi allannguissamut aalajangiisinaavoq, matumani innuttaasup neqeroorummi ikiorsiissutisiaanik allannguinerit ilanngullugit. Allannguutit § 6 naapertorlugu iliuuseqarnissamut pilersaarummut naapertuutinnippata, nutaamik iliuusissatut pilersaarusiortoqaqqaartinnagu allannguutit aallartinneqarsinnaanngillat. Taamaakkaluartoq pissutsit immikkut ittut pissutigalugit, iliuusissatut pilersaarusiortoqartinnagu allannguutit aallartinneqarsinnaapput.

Imm. 2. Imm. 1 naapertorlugu aalajangiineq, nunami kommunip aalajangiisup sumiiffigisaani, inatsisit naapertorlugit aalajangerneqassaaq. Taamaakkaluartoq nunami kommunip tiguisup sumiiffigisaani inatsisitigut neqeroorutigineqanngitsut pillugit aalajangiisoqarsinnaanngilaq.

Imm. 3. Kommune aalajangiisoq aamma kommune tiguisoq isumaqatigiisummi § 5 naapertorlugu aalajangiisinaapput, innuttaasup neqeroorummi najugaqartinneqarnera pillugu, kommune aalajangiisoq sinnerlugu kommune tiguisoq aalajangiisinaasoq. Oqaaseqatigiit siulleq naapertorlugu aalajangiineq, nunami kommunip tiguisup sumiiffigisaani, inatsisit naapertorlugit pissaaq.

§ 12. Innuttaasoq navianartorsiorsinnaanikkut peqqissutsikkullu aarlerinartoqarpat, imaluunniit innuttaasoq pingaarutilimmik ikiorserneqarnissamut pisariaqartitsileriataarpat, kommune tiguisoq innuttaasumut suliniut pillugu allannguinnissamut utaqqiisaagallartumik aalajangiisinnaavoq. Nunami kommunip tiguisup sumiiffigisaani inatsisit naapertorlugit utaqqiisaagallartumik aalajangiisoqassaaq.

Imm. 2. Kommune aalajangiisoq § 11 naapertorlugu aalajangiisinnaanissaa siunertaralugu, kommune tiguisoq imm. 1 naapertorlugu aalajangiigallarnini pillugu kommunimut aalajangiisumut pisariaqanngitsumik kinguarsaanani ilisimatitsissaaq.

Imm. 3. Imm. 1 naapertorlugu utaqqiisaagallartumik aalajangiineq, kommunip aalajangiisup § 11 naapertorlugu aalajangiinissaata tungaanut, imaluunniit § 13 naapertorlugu aalajangiinerup kingunerisaanik, inuttaasup neqeroorummi najugaqartinneqarnerata unitsinneqarnissaata tungaanut atuutissaaq.

Imm. 4. Kommune tiguisoq aalajangiisorlu isumaqatigiisummi § 5 naapertorlugu aalajangiisinnaapput, kommune tiguisoq imm. 1-imi aalajangersakkamit annertunerusumik aalajangiigallarsinnaasoq.

Unitsitsineq

§ 13. Kommune aalajangiisoq, nunami kommunip aalajangiisup sumiiffigisaani inatsisit naapertorlugit, innuttaasup neqeroorummi najugaqartinneqarnerata unitsinneqarnissaa pillugu aalajangiisinnaavoq. Kommunip aalajangiisup aalajangiineq pillugu kommunalbestyrelse tunngavissaqanngitsumik kinguarsaanani nalunaarfissavaa. Kommune tiguisoq aalajangiineq pillugu paasissutissinneqartinnagu, innuttaasup neqeroorummi najugaqartinneqarnera unitsinneqarsinnaanngilaq.

Imm. 2. Kommune aalajangiisoq kommunilu tiguisoq isumaqatigiisummi § 5 naapertorlugu unitsitsineq pillugu sukumiinerusumik aalajangersaasinnaapput, matumani kalerriinissamut killiliussat ilanngullugit. Isumaqatigiisummi kalerriisarneq pillugu maleruagassanut avaqqutaarisumik aamma nunami kommunip aalajangiisup sumiiffigisaani inatsisinut atuuttussaatinneqartussanik aalajangersaasoqarsinnaanngilaq.

Kapitali 4

Akiliineq

§ 14. Kommunip tiguisup innuttaasup neqeroorummi najugaqarnissaanut neqeroorummut aningaasartuutit, allallu innuttaasumut suliniutaasinnaasut akilissavai.

Imm. 2. Isumaqatigiisummi § 5 aamma iliuusissatut pilersaarummi § 6 naapertorlugit innuttaasup neqeroorummi najugaqarnissaanut neqeroorummut aningaasartuutit, allallu innuttaasumut suliniutaasinnaasut, inaarutaasumik aningaasartuutit kommunip aalajangiisup akilissavai. Kommunip tiguisup aningaasartuutit naatsorsorlugillu akiligassanngortittassavai.

Imm. 3. Innuttaasup neqeroorummi najugaqarnissaanut aningaasartuutit, allallu innuttaasumut

suliniutaasunut aningaasartuutit, nunami kommunip tiguisup sumiiffigisaani inatsisini maleruagassat naapertorlugit naatsorsorneqassapput.

Imm. 4. Kommune tiguisoq innuttaasumut suliniutaasup allanngortinnissaanut § 11, imm. 3 naapertorlugu aalajangerpat, kommune aalajangiisoq akiliinissamat pisussaatitaaffeqarpoq.

Imm. 5. Kommune tiguisoq innuttaasumut suliniutaasup allanngortinnissaanut § 12 naapertorlugu utaqqiisaagallartumik aalajangerpat, kommune aalajangiisoq akiliinissamat pisussaatitaaffeqarpoq.

§ 15. Isumaginninnikkut sullissineq pillugu inatsimmi, ikiorsiissutinik naalagaaffimmut utertitsineq pillugu aalajangersakkat, imaluunniit tamanna pissutigalugu maleruagassiat Danmarkimi kommunimut aalajangiisumut, innuttaasumik neqeroorummi Kalaallit Nunaannut inissiimasumut atuupput. Isumaginninnermut tunngasuni inatsisitigut illersugaaneq allaffissornerlu pillugu inatsimmi § 85-ip malitsigisaanik atuuttuulersinneqartumik, Danmarkimi kommunip aalajangiisup naatsorsuutiniq saqqummiussinermi kukkuneruunermilu malittarisassat malissagai piumasagaataavoq.

§ 16. Allaffissornermut aningaasartuutit kommunip tiguisup akilissavai.

Kapitali 5

Angalanerit

§ 17. Kommune aalajangiisoq Kalaallit Nunaata Danmarkillu akornanni angalanerit pillugit aalajangiisaaq, matumani angalaqatigiinnerit innuttaasullu angalaneranut aningaasartuutit.

Imm. 2. Imm. 1 naapertorlugu aalajangiineq, nunami kommunip aalajangiisup sumiiffigisaani, inatsisit naapertorlugit aalajangerneqassaaq.

Imm. 3. Kommunip aalajangiisup imm. 1 naapertorlugu angalanerimut aningaasartuutit tamaasa akilissavai.

Kapitali 6

Nuuttoqartillugu nalunaartussaataaneq

§ 18. Ilaqutariit ataatsimik arlalinnilluunniit 18-it inorlugit ukiulimmik/-nnik meerartaqarpata, Danmarkimiit Kalaallit Nunaannut nuuppata, Danmarkimilu kommune qimanneqartoq isumaqarpat meeraq meeqqalluunniit immikkut pisariaqartitai naapertorlugit ikiorserneqartariaqartoq/-tut, Danmarkimi kommunip qimanneqartup Kalaallit Nunaanni kommune tikinneqartoq tamanna pillugu nalunaarfigissavaa.

Imm. 2. Aamattaaq angajoqqaanngortussat qitornassaat immikkut pisariaqartitaqassapput, ikiorsisariaqarnermut atatillugu imm. 1 atuuppoq.

Imm. 3. Imm. 1 aamma 2 malillugit nalunaaruteqarnermut atatillugu, kommunip qimanneqartup suliami atortut pisariaqartinneqartut nassiutissavai, tassunga ilanngullugu suliami kommunip naliliineranit

attuumassuteqartumit eqikkaaneq.

Kapitali 7

Isumaqatigiinngittoqartillugu aalajangiineq

§ 19. Kommunip tiguisup aalajangiisullu akornanni nalunaarut manna naapertorlugu, pissussaaffiit pillugit isumaqatigiinngittoqarpat, Ankestyrelse isumaginninnikkut sullissineq pillugu inatsimmi § 196, imm. 3 naapertorlugu aalajangiissaaq.

Kapitali 8

Atuutilersitsinermi ikaarsaariarnermilu aalajangersakkat

§ 20. Nalunaarut 1. juuli 2017-imi atuutilerpoq.

Imm. 2. Danmarkimi imaluunniit Kalaallit Nunaanni tikeraarluni angalanerit, aamma najugaqarfitsigut neqeroorutigineqartuni najugaqarneq pillugu nalunaarut nr. 1389, 12. decembari 2006-imeersoq atorunnaarsinneqarpoq.

§ 21. Nalunaarut Danmarkimi imaluunniit Kalaallit Nunaanni kommunalbestyrelsimit piffissami nalunaarutip atuutilerfianit aalajangerneqartunut atuuppoq.

Imm. 2. Nalunaarummi §§ 7-17 aamma § 19 innuttaasunut nalunaarutip atuutilerneratigut, Kalaallit Nunaanni kommunalbestyrelsip aalajangerneratigut neqerooruteqarnikkut Danmarkimi inissinneqartunut, imaluunniit najugaqartinneqartunut atatillugu, kiisalu innuttaasunut nalunaarutip atuutilerneratigut, Danmarkimi kommunalbestyrelsip aalajangerneratigut neqerooruteqarnikkut Kalaallit Nunaanni inissinneqartunut imaluunniit najugaqartinneqartunut atatillugu atuupput.

Børne- og Socialministeria, ulloq 31. maaji 2017

Mai Mercado

/ Anita Hørby